

In surpassament sa esser cars

Prest vegnan las zonas da ruaus per la selvaschina puspei en funcziun

Da Hans Huonder / anr

La stagiun freida ei arrivada e cun ella il temps che la selvaschina tscherca siu refugi d'unviern. En bein enqual liug sesanfla quel en ina da pliras zonas da ruaus. Ils davos decennis ein talas zonas vegnidas scaffidas egl entir cantun Grischun. Las zonas da ruaus sesanflan meinsvart en loghens pertuccai mo indirectamein dil turissem, vul dir per exempel ella vischinonza da territoris da skis ni en loghens frequentai stediamein da turas da skis che ston buc exnum vegnir traversai. «Las zonas ein secumprovadas cumpleinamein. Ellas porschan als animals selvadis la protecziun ed il ruaus necessari duront igl unviern e l'entschatta dalla primavera», di *Arnold Caminada* da Vrin, guardiaselvaschina e cau dalla regiun da catscha dalla Surselva. Per che las zonas seigien buca semplamein mo farsas fan ils guardiaselvaschina regularmein controllas: «Quellas succedan sistematicamein duront l'jamna ora. Ina ga ni l'autra survegnin nus denton era in'annunzia ch'enzatgi sesanfli en ina zona da ruaus.» Tgi che vegn engartaus vegn tgislaus tier la procura publica e sto quintar cun in multa che semova denter 400 e 500 francs. Las zonas da ruaus ein marcadadas els loghens principals. Las tablas montadas leu cuntegnan las informaziuns necessarias pil sportist e viandont.



La selvaschina che ha ruaus spargna impurtonta energia Ils proxims dis van ils scamonds da penetrar en zonas da ruaus per la selvaschina puspei en vigur

Da Hans Huonder / anr

El decuors dils davos decennis ein rodund 250 zonas da ruaus per la selvaschina vegnidas fixadas el cantun Grischun, 54 da quellas sesanflan en Surselva. Tenor il guardiaselvaschina e cau dalla regiun da catscha dalla Surselva, Arnold Caminada da Vrin, ein ellas secumprovadas. Alla selvaschina porschan ellas protecziun e gidan aschia a spargnar impurtonta energia per surmontar igl unviern. Cul turissem, cul temps liber e cun las pusseivladads da saver sedivertir ella natira ei era il disburbi dalla selvaschina duront igl unviern carschius. En concordanza cun tut ils pertuccai, pia era organisaziuns dil turissem e

pendicularas, ei vegniu scaffiu zonas da ruaus ils davos onns. «Ellas risguardan loghens nua che la selvaschina viva duront igl unviern e l'entschatta dalla primavera. Per ordinari sesanflan ellas leu nua ch'igl ei pusseivel da proteger ils animals selvadis da sportists», di Caminada. Las zonas sesanflan pia buc els centers cun turissem da skis, mobein agl ur. Aschia pon tuts interess vegnir risguardai.

Da grond'impurtonza

«Quellas zonas ein da grond'impurtonza per la selvaschina», puntuescha Caminada. Menziun speciala fa el dalla tscharva: «Il temps d'unviern sesiara il magun tier la tscharva, ella drova fetg pauca vivonda per survivor. En quei temps sesbassa la temperatura dil tgierp entochen sin 17 grads.» Quei fenomen dalla temperatura vegn era constataus tier auters animals selvadis. Pusseivel da survivor cun quellas cundiziuns eis ei denton mo sche la tscharva ha ruaus. Aschia sa ella spargnar energia ch'ei impurtonta per survivor. «Cura che la tscharva stat sin peis ina damaun d'unviern cun ina temperatura dall'aria da minus diesch grads ni aunc pli bassa, trembla ella igl empren. Ella vegn lu ella fasa che la temperatura dil tgierp crescha e pér suenter rodund in quart ura ha il tgierp las cundiziuns per semover e magliar», di il guardiaselvaschina. Ins sappi cumprender tgei ch'ei vegli dir per ina tscharva che vegni surprida e spuentada en quella fasa: «Quei animal vegn ad haver grondas dolurs.» In ulteriur factur che plaيدا en favur dallas zonas da ruaus ein ils donns vid igl uaul. «Animals che han ruaus drovan dameins energia e cheutras era pli pauca vivonda. Consequentamein donnegieschan els buca la regiuvinaziun», constatescha Caminada. El ei perschadius che las zonas da ruaus ein oz ina necessitad e ch'ellas ein secumprovadas. Ulteriuras zonas vegn ei strusch a dar ils proxims onns: «Ei savess silpli esser ch'ei dess difficultads enzanua e che quellas pretendessen ina nova zona ni l'engrondaziun d'ina existenta.»

Tgisa e multa

Tgi che penetrescha en ina zona da ruaus e vegn pigliaus sto quintar cun ina tgisa ed ina multa. «Il castitg semova per ordinari denter 400 e 500 francs», di Caminada. La tgisa succeda entras la survigilanza da catscha tier la procura publica. Tenor Caminada ha ei dau en Surselva igl onn vargau rodund diesch tgisas, pil pli personas singulas ni gruppas da duas personas. «Nus constatein ch'ils guides e scolasts da skis san plaun a plaun nua che las zonas da ruaus ein e ch'ei capeta strusch pli ch'entiras gruppas surpassan quellas. Ei quei tonaton aschia vegnan tuttas personas tgisadas. Igl ei buc aschia ch'il guid ni il scolast dad skis persuls vegn castigiaus», di Caminada. La survigilanza fa controllas sistematicamein mintg'jamna, ina ga ni l'autra vegn ella era informada d'autras personas ch'enzatgi sesanfli en ina zona da ruaus ni ch'ils survigiladers fan casualmein in'observaziun. Leu nua ch'ei dat neginas zonas da ruaus sa la gliעד en sesez semover libramein. Caminada constatescha che quei sa era esser problematic: «In problem ei quei meins tier la gliעד che va cun skis da turas, mobein tier quellas e quels che fan ina spassegiada cun gianellas. Magari ei quei gliעד ch'enconuscha buca la regiun e las cundiziuns. Da principi eis ei denton aschia che nus havein spartiu ussa las zonas da ruaus sco refugis per la selvaschina digl ulteriur territori ch'ei accessibels.» Ei detti tonaton aunc ordeifer las zonas da ruaus loghens fetg spuretgs nua che la selvaschina anfli protecziun senza vegnir disturbada dil carstgaun.

